

& de Mes-dames de Nostre Dame de Mont-real. Voilà le premier fruit que cete Isle a porté pour le Paradis, ce ne sera pas le dernier, *Crescat in mille millia.*

Le quinziesme d'Aoust on solemnisa la premiere Feste de cete Isle-Saincte, le iour de la glorieuse & triomphante Assomption de la Saincte Vierge. Le beau tabernacle que ces Messieurs ont enuoyé, fut mis sur l'Autel d'vne Chapelle, qui pour n'estre eneor bastie que d'écorce, n'en est pas moins riche. Les bonnes Ames qui s'y rencontrerent, se communierent. On mit sur l'Autel les noms de ceux qui soustienent les desseins de Dieu en la Nouvelle France, & chacun s'efforça de bannir l'ingratitude de son cœur, & de se ioindre avec les Ames saintes, qui nous sont vnies par des chaines plus pretieuses que l'or & que les diamans, chanta le *Te Deum* en action de graces, de ce que Dieu nous faisoit la grace de voir le premier iour d'honneur & de gloire; en vn mot, la premiere grande Feste de Nostre Dame de Mont-real, le tonnetre des canons fut retentir toute l'Isle; & les Demons, quoy qu'accoustumez aux foudres, furent épouuantez d'vn bruit qui parloit de l'amour que nous